

Forslag til forskrift xx.xx.2020 om godtgjersle, dekking av utgifter, m.m. for folkevalde i Samnanger kommune

Dato:

Ikrafttredelse:

Hjemmel:

Kunngjort:

Korttittel: Forskrift om godtgjersle m.m. for folkevalde i Samnanger kommune

Kapitteloversikt:

Kapittel 1. Generelle reglar (§ 1-1)

Kapittel 2. Folkevalde sin rett til økonomisk godtgjersle (§§ 2-1 – 2-8)

Kapittel 3. Erstatning for tap av inntekt (§§ 3-1 – 3-2)

Kapittel 4. Dekking av utgifter (§§ 4-1 – 4-3)

Kapittel 5. Utstyr (§ 5-1)

Kapittel 6. Utbetaling av godtgjersle, utgiftsdekking og erstatning for tapt inntekt (§§ 6-1 – 6-3)

Kapittel 7. Ettergodtgjersle og pensjonsordning (§§ 7-1 – 7-2)

Kapittel 8. Permisjonar (§ 8-1)

Kapittel 9. Ikrafttreding (§ 10-1)

Heimel: Fastsett av Samnanger kommunestyre xx. xxxxxx 20xx med heimel i lov 22. juni 2018 om kommuner og fylkeskommuner (kommuneloven) § 8-3, § 8-4, § 8-6 og § 8-10

Kap. 1. Generelle reglar

§ 1-1. Føremål og verkeområde

Føremålet med forskrifta er å regulera rettar og plikter etter kommunelova kapittel 8 for folkevalde i Samnanger kommune.

Kap. 2. Folkevalde sin rett til godtgjerlse

§ 2-1. Arbeidsgodtgjersle

Alle som har eit kommunalt tillitsverv har krav på godtgjersle for arbeidet sitt. Arbeidsgodtgjersle vert utbetalt enten som fast godtgjersle eller som møtegodtgjersle, etter dei reglane som er fastsett i denne forskrifta. Det vert ikkje rekna feriepengar av godtgjersler til folkevalde, fordi folkevalde ikkje er omfatta av reglane i ferielova.

§ 2-2. Frikjøp og godtgjersle for ordførar

Ordføraren vert frikjøpt i 100 % stilling.

Ordføraren får ei fast årleg godtgjersle på 85 % av stortingsrepresentantane si godtgjersle, runda av oppover til nærmaste heile 100 kroner. Ordførargodtgjersla skal regulerast 1. januar kvart år.

Ordføraren mottok ikkje møtegodtgjersle.

§ 2-3. Godtgjersle for varaordførar

Varaordføraren får ei fast årleg godtgjersle på 6 % av ordførargodtgjersla, runda av oppover til nærmaste heile 100 kroner. Denne godtgjersla er kompensasjon for funksjonen som stadfortredar for ordføraren i feriar og ved kortare sjukefråvær hos ordføraren (opptil ein «arbeidsgjevarperiode» på 16 kalenderdagar), og for deltaking på arrangement der varaordføraren møter i staden for ordføraren.

Varaordføraren får i tillegg til den faste godtgjersla utbetalt møtegodtgjersle og dekking av utgifter og økonomisk tap etter dei same reglane som andre folkevalde.

Dersom ordføraren vert indisponert i ein lengre periode grunna sjukdom eller liknande, og varaordføraren overtek alle oppgåvene til ordføraren, skal varaordføraren ha utbetalt ordførargodtgjersle. Kommunestyret må i kvart enkelt tilfelle bestemma kva tidspunkt utbetaling av ordførargodtgjersla skal gjelda frå. Dersom varaordføraren berre overtek delar av ordføraren sine oppgåver, kan kommunestyret fastsetja ei passande godtgjersle.

§ 2-4. Godtgjersle for leiarar i utval/råd

Leiarane i naturutvalet, kontrollutvalet og eldrerådet får ei fast årleg godtgjersle som kompensasjon for tilleggsoppgåver dei har i forhold til andre medlemmer. Satsane for godtgjersle er som følgjer:

- a) Leiar i naturutvalet og leiar i kontrollutvalet: 2,25 % av ordførargodtgjersla, runda av oppover til nærmaste heile 100 kroner.
- b) Leiar i eldrerådet: 0,75 % av ordførargodtgjersla, runda av oppover til nærmaste heile 100 kroner.

Ved fråvær frå meir enn 1/3 av møte i eit kalenderår, vert godtgjersla redusert med 25 % av årleg fast godtgjersle. Fråvær som skuldast sjukdom eller anna gyldig forfall, skal ikkje føra til reduksjon i godtgjersla.

Dersom leiar i naturutvalet, kontrollutvalet eller eldrerådet vert indisponert i ein periode på meir enn tre månader, kan kommunestyret bestemma at nestleiar skal få utbetalt leiaragodtgjersle.

Leiarane i naturutvalet, kontrollutvalet og eldrerådet får i tillegg til den faste godtgjersla utbetalt møtegodtgjersle og dekking av utgifter og økonomisk tap etter dei same reglane som andre folkevalde.

Leiarar i andre utval/råd får ikkje ei fast godtgjersle. Kommunestyret kan likevel bestemma noko anna når eit utval/råd vert oppretta.

§ 2-5. Møtegodtgjersle

Møtegodtgjersle er ein kompensasjon for deltaking på og førebuing til møte. Det er to satsar for møtegodtgjersle:

- a) Høg sats: 0,2 % av ordførargodtgjersla
- b) Låg sats: 0,1 % av ordførargodtgjersla

Høg sats for møtegodtgjersle vert utbetalt til møtande medlemmer og varamedlemmer i kommunestyret, formannskapet, naturutvalet, kontrollutvalet, administrasjonsutvalet, arbeidsmiljøutvalet, elderrådet, rådet for personar med nedsett funksjonsevne, valstyret, røykestyra, sakkunnig nemnd for eigedomsskatt og klagenemnda for eigedomsskatt.

Låg sats for møtegodtgjersle vert utbetalt til møtande medlemmer og varamedlemmer i andre utval, råd, styre, komitear og nemnder som er oppretta av kommunestyret med heimel i kommunelova eller særlov. Det vert berre utbetalt møtegodtgjersle til folkevalde, ikkje til medlemmer som representerer andre enn Samnanger kommune.

Kommunestyret kan òg bestemma at høg sats skal utbetalast til andre utval, råd, styre, komitear og nemnder enn dei som er lista opp i andre ledd ovanfor. Dette bør berre gjerast dersom det er grunn til å tru at arbeidsbelastninga for medlemmene vil vera stor.

Varamedlemmer som berre deltek i handsaminga av ei sak i møte der det er fleire saker oppe til handsaming, får halv møtegodtgjersle.

Dersom folkevalde som er kommunen sin representant i eksterne styre, råd eller liknande får utbetalt møtegodtgjersle direkte frå styret/rådet, skal den folkevalde ikkje ha utbetalt møtegodtgjersle frå kommunen i tillegg.

Tilsettrepresentantar i utval, råd, styre, komitear og nemnder får ikkje utbetalt møtegodtgjersle. For møte som vert haldne utanfor den tilsette si normale arbeidstid, får den tilsette utbetalt lønn og eventuelt overtidsgodtgjersle etter reglane i gjeldande tariffavtale.

§ 2-6. Møtegodtgjersle for ungdomsrådet

Satsen for møtegodtgjersle for ungdomsrådet er 0,05 % av ordførargodtgjersla, jf. vedtekter for ungdomsrådet.

§ 2-7. Godtgjersle ved deltaking på kurs

I samband med pliktig deltaking på eksterne kurs og nettbaserte kurs som varer meir enn to timar, kan folkevalde få utbetalt godtgjersle:

- a) Eksterne kurs: 0,2 % av ordførargodtgjersla pr. kursdag
- b) Nettbaserte kurs på minst to timar: 0,1 % av ordførargodtgjersla pr. kursdag

§ 2-8. Kyrkjestyret/soknerådet

Kyrkjestyret/soknerådet vedtek sjølve kva ordning og satsar dei skal ha for godtgjersle, men ordninga må haldast innanfor kyrkjestyret/soknerådet si budsjettramme.

Ved kommunestyret si budsjettildeling vert det lagt til grunn same satsar for leiargodtgjersle som tidlegare gjaldt for overformynderiet (1 % av ordførargodtgjersla) og same sats for møtegodtgjersle som mellom anna formannskapet (høg sats). Det vert vidare lagt til grunn ein møtefrekvens på ti årlege møte.

Kap. 3. Erstatning for tap av inntekt

§ 3-1. Erstatning av tap av inntekt

Folkevalde i kommunen har krav på erstatning for tap av inntekt som skuldast pliktig deltaking på møte eller kurs/opplæring som kommunalt folkevald. Den folkevalde må senda krav om erstatning til kommunen. Krav skal sendast inn fortløpande, seinast tre månader etter møtet/kurset. Legitimert tap må dokumenterast med stadfesting frå arbeidsgjevar/tilsvarande. Satsane i § 3-2 inkluderer også erstatning for eventuelle tapte feriepengar.

§ 3-2. Satsar for erstatning av tapt inntekt

- a) Legitimert (dokumentert) inntektstap:

Legitimert (dokumentert) inntektstap ved deltaking på møte/kurs:	Inntil 0,5 % av ordførargodtgjersla.
--	--------------------------------------

- b) Ikkje legitimert (udokumentert) inntektstap:

Møte/kurs som varar over seks timar inkl. reisetid:	Inntil 0,45 % av ordførargodtgjersla.
Møte/kurs som varar frå tre til seks timar inkl. reisetid:	Inntil 0,3 % av ordførargodtgjersla.
Møte/kurs som varar mindre enn tre timar inkl. reisetid:	Inntil 0,2 % av ordførargodtgjersla

Kap. 4. Dekking av utgifter

§ 4-1. Dekking av utgifter til nødvendig tilsyn av barn m.m.

I samband med deltaking på møte og kurs kan folkevalde få dekkja legitimerede ekstraavgifter til nødvendig tilsyn av barn opptil 12 år eller andre ein har omsorg for. Den folkevalde må senda krav om dekkning av utgifter til kommunen. Kravet må sannsynleggjerast og så langt som mogleg dokumenterast. Krav skal sendast inn fortløpande, seinast tre månader etter møtet/kurset. Utgifter kan dekkast med inntil 0,25 % av ordførargodtgjersla.

§ 4-2. Skyss-, kost- og overnattingsgodtgjersle for reiser

Folkevalde har krav på skyss-, kost- og overnattingsgodtgjersle i samband med tillitsvervet. Godtgjersle kan krevjast for alle reiser over fire kilometer (tur/retur) i samband med pliktig deltaking på møte og kurs/opplæring. Den folkevalde må senda krav om godtgjersle til kommunen. Krav skal sendast inn fortløpande, seinast tre månader etter reisa.

Godtgjersle vert gitt etter reglane og satsane i det kommunale reiseregulativet.

§ 4-3. Dekking av utgifter til telefon

Ordføraren får disponera fri kommunal mobiltelefon både i og utanom kontortida.

Varaordføraren får telefongodtgjersle etter den same satsen som til ei kvar tid gjeld for tilsette i kommunen.

Kap. 5. Utstyr

§ 5-1. Nettbrett

Faste medlemmer og første og andre varamedlemmer i kommunestyret, formannskapet, naturutvalet og kontrollutvalet får tilbud om å disponera kommunalt nettbrett i valperioden.

Alternativt kan dei velja å få utbetalt ein økonomisk kompensasjon mot at dei held seg med nettbrett/PC sjølv. Kompensasjonen er på 0,1 % av ordførargodtgjersla pr. år.

Kap. 6. Utbetaling av godtgjersle, utgiftsdekking og erstatning for tapt inntekt

§ 6-1. Utbetaling av fast godtgjersle til ordførar og varaordførar

Fast godtgjersle til ordførar og varaordførar vert utbetalt månadleg med 1/12 av årsbeløp.

§ 6-2. Utbetaling av møtegodtgjersle og godtgjersle til leiarar av utval/råd

Møtegodtgjersle og godtgjersle til leiarar av utval/råd vert utbetalt ein gong kvart halvår med halvparten av årsbeløpet, normalt i juni og november.

§ 6-3. Utbetaling av utgiftsdekking, kilometergodtgjersle og erstatning for tapt inntekt

Utbetaling av utgiftsdekking, kilometergodtgjersle og erstatning for tapt inntekt vert normalt gjort månaden etter at kravet er levert inn.

Kap.7. Ettergodtgjersle, pensjonsordning og ytingar ved dødsfall/gruppelivsforsikring

§ 7-1. Ettergodtgjersle for ordførar

Følgjande gjeld for ettergodtgjersle til ordførar, jf. reglar i kommunelova § 8-6:

Ordførar som stiller til attval, men som ikkje vert attvald:	Det skal i utgangspunktet utbetalast ettergodtgjersle i tre månader. Retten til ettergodtgjersle skal avkortast krone for krone mot anna inntekt, samt mot eventuell ordinær inntekt som den folkevalde frivillig avstår frå. Pensjonsinntekter etter folketrygdlova kapittel 19 og kapittel 20 skal her ikkje reknast som inntekt.
Ordførar som ikkje stiller til attval:	Det skal i utgangspunktet utbetalast ettergodtgjersle i 1,5 månad. Retten til ettergodtgjersle skal avkortast krone for krone mot anna inntekt, samt mot eventuell ordinær inntekt som den folkevalde frivillig avstår frå. Pensjonsinntekter etter folketrygdlova kapittel 19 og kapittel 20 skal her ikkje reknast som inntekt.

§ 7-2. Pensjonsordning for ordførar

Samnanger kommune skal ha same pensjonsordning for folkevalde som for dei tilsette. Ordføraren vert meldt inn i pensjonsordninga.

§ 7-3. Ytingar etter dødsfall/gruppelivsforsikringar

Ordføraren skal omfattast av § 10 i hovudtariffavtalen - «ytelser etter dødsfall/gruppelivsforsikringer» - på linje med tilsette i kommunen.

Kap. 8. Permisjonar

§ 8-1. Permisjonar for ordføraren

Ordføraren har rett til permisjonar etter reglane i kommunelova § 8-6, jf. reglar i arbeidsmiljølova § 12-1 til § 12-10, 12-12 og 12-15. Ordføraren har i samband med slike permisjonar rett til å behalda godtgjersla etter dei same reglane som gjeld for tilsette i kommunen. Søknader om permisjon skal avgjerast av kommunestyret.

Kap. 9. Ikrafttreding

§ 9-1. Ikrafttreding

Forskrifta trer i kraft xx. xxxxxx 20.